

Nóta míniúcháin a ghabhann leis an togra le haghaidh leasú ar Rialachán 1408/2013 maidir le cur i bhfeidhm Airteagail 107 agus 108 den Chonradh ar Fheidhmiú an Aontais Eorpaigh maidir le cabhair *de minimis* in earnáil na talmhaíochta

Is é is cuspóir don nóta seo soiléiriú a dhéanamh ar chuspóir agus raon feidhme an leasaithe atá beartaithe ar Rialachán 1408/2013 maidir le cur i bhfeidhm Airteagail 107 agus 108 den Chonradh ar Fheidhmiú an Aontais Eorpaigh maidir le cabhair *de minimis* in earnáil na talmhaíochta ('Rialachán 1408/2013'). Gabhann sé leis an gcomhairliúchán maidir leis an togra a bheidh ar oscailt go dtí an 21.7.2024.

Iarrtar ar shaoránaigh, ar eagraíochtaí agus ar údaráis phoiblí a dtuairimí a chur in iúl maidir leis an leasú atá beartaithe.

Iarrtar ar pháirtithe leasmhara a mbarúlacha a chur ar fáil i bhformáid leictreonach agus ba cheart dóibh a léiriú go soiléir an bhfuil a bhfreagra faoi rún. Sa chás sin, ba cheart leagan neamhrúnda den fhreagra a sholáthar freisin, ar féidir é a fhoilsiú ar shuíomh gréasáin Ard-Stiúrthóireacht na hIomaíochta.

1. Comhthéacs

Is éard is 'cabhair *de minimis*' ann tacaíocht atá beag go leor chun a mheas nach saobhann sí an iomaíocht nó nach ndéanann sí difear don trádáil idir na Ballstáit. Dá réir sin, meastar nach Státchabhair atá i gcabhair *de minimis*. Mar gheall ar an méid teoranta, ceadaítear leis an Rialachán *de minimis* díolúintí ó rialú Státchabhrach le haghaidh na tacaíochta sin.

Tá feidhm ag Rialachán 1408/2013 maidir le cabhair *de minimis* a dheonaítear do ghnóthais atá gníomhach i dtáirgeadh príomhúil táirgí talmhaíochta. Le blianta beaga anuas, bhí ar earnáil feirmeoireachta na hEorpa aghaidh a thabhairt ar bhrú boilscitheach agus praghsanna arda tráchtarraí.

An 18 Aibreán 2024, mhol an Chomhairle Eorpach don Choimisiún 'leanúint den obair ar an bhféidearthacht an uasteorainn ar chabhair *de minimis* don talmhaíocht a mhéadú'.

Go ginearálta, déanann an Coimisiún athbhreithniú rialta ar na rialacha maidir le Státchabhair agus cuireann sé in oiriúint iad do dhinimic an mhargaidh inmheánaigh. Rachaidh na rialacha *de minimis* atá ann faoi láthair in éag an 31 Nollaig 2027. Mar sin féin, i bhfianaise na ngnéithe a mhínítear thuas, measann an Coimisiún gurb iomchuí a n-athbhreithniú a chur chun cinn.

2. An leasú atá beartaithe

Tugtar aghaidh sa leasú ar dhá phríomhghné: (i) na huasteorainneacha *de minimis* agus (ii) na ceanglais trédhearcachta.

Uasteorainn de minimis aonair

Ó bhí 2019 ann, tá an uasteorainn *de minimis* aonair socraithe ag EUR 20 000 in aghaidh an ghnóthais thar aon tréimhse 3 bliana fhioscacha. Féadfaidh na Ballstáit uasteorainn níos airde a roghnú, arna socrú ag EUR 25 000 in aghaidh an ghnóthais thar an tréimhse chéanna, ar choinníoll go mbunóidh siad clár lárnach de chabhair *de minimis*.

I gcomhréir le dlí-eolaíocht Chúirteanna an Aontais, ní féidir leis an gCoimisiún na huasteorainneacha a mhéadú ach amháin a mhéid nach bhfuil aon riosca ann go ndéanfar an

iomaíocht agus an trádáil a shaobhadh. Dá réir sin, tá teorainn le discréd an Choimisiúin maidir leis na huasteorainneacha *de minimis* a shocrú.

I bhfianaise an mhéid sin, tá sé beartaithe ag an gCoimisiún an uasteorainn aonair a mhéadú go EUR 37 000. Déantar é sin a ríomh bunaithe ar an mboilsciú iarbhair ó rinneadh an t-athbhreithniú deireanach ar an Rialachán in 2019, bunaithe ar [shonraí ICPT Eurostat](#),¹ chomh maith leis an mboilsciú réamh-mheasta bunaithe ar réamhaisnéis ón gCoimisiún Eorpach i gcás ina mbeidh fáil air (na blianta 2024 agus 2025)² chomh maith le sprioc boilscithe BCE le haghaidh na mblianta atá fágtha go dtí deireadh beartaithe bhailíocht an Rialacháin (31.12.2032).

Caidhp náisiúnta

Sa bhreis ar an uasteorainn *de minimis* aonair, leagtar síos le Rialachán 1408/2013 freisin caidhp charnach de chabhair *de minimis* in aghaidh an Bhallstáit (ar a dtugtar ‘an chaidhp náisiúnta’). Socraítear an chaidhp sin ag 1.25 % de mheánluach na 3 bliana is airde de tháirgeadh talmhaíochta sa tréimhse 2012-2017. I gcás ina raibh clár lárnach de chabhair *de minimis* curtha ar bun ag Ballstát, déantar an chaidhp náisiúnta a ríomh ina ionad sin ag 1.5 % de mheánluach na 3 bliana is airde de tháirgeadh talmhaíochta sa tréimhse 2012-2017.

Chun na caidhpeanna náisiúnta a choigeartú, tá sé beartaithe ag an gCoimisiún síneadh a chur leis an tréimhse a chuirtear san áireamh don ríomh, i.e. chun an ríomh a bhunú ar na blianta 2012-2023.

Ós rud é gur tugadh isteach clár éigeantach *de minimis* (féach thíos), tá sé beartaithe ag an gCoimisiún tairseach aonair amháin agus caidhp náisiúnta amháin a shocrú, bunaithe ar an modheolaíocht chéanna a chuirtear i bhfeidhm faoi láthair chun an chaidhp náisiúnta a ríomh sna Ballstáit a bhfuil clár lárnach curtha ar bun acu. Dá réir sin, ríomhtar an chaidhp náisiúnta athbhreithnithe atá beartaithe mar 1.5 % de mheánluach na 3 bliana is airde de tháirgeadh talmhaíochta sa tréimhse 2012-2023. Maidir leis an gcaidhp náisiúnta don Ríocht Aontaithe i ndáil le Tuaisceart Éireann, mar gheall ar infhaighteacht sonraí, cuirtear an tréimhse 2012-2022 san áireamh ag an gcéim seo.

An tréimhse a chuirtear san áireamh chun measúnú a dhéanamh ar chomhlíonadh na huasteorann de minimis

Molann an Coimisiún an ríomh a ailíniú le Rialachán 2023/2832 agus an méid carnach a ríomh thar 3 bliana, in ionad an ríomha atá ann faoi láthair thar 3 bliana fhioscacha.

Trédhearcacht

Chun na ceanglais trédhearcachta a chomhlíonadh, faoi láthair tá an rogha ag na Ballstáit clár *de minimis* a chur ar bun nó féindearbhu a fháil ó na tairbhíthe. Ach léiríodh le seiceáil oiriúnachta 2019 nach bhfuil an córas seo sásúil agus go bhféadfaí feabhas a chur air. I gcomhréir le Rialachán 2023/2831 a athbhreithníodh le déanaí, molann an Coimisiún, dá bhrí

¹ Sonraí arna bhfoilsiú ag Eurostat faoi

https://ec.europa.eu/eurostat/databrowser/view/tec00118/default/table?lang=en&category=t_prc.t_prc_hicp (arna rochtain an 3.6.2024).

² Réamhaisnéis earraigh 2024 ón gCoimisiún Eorpach arna foilsiú faoi https://economy-finance.ec.europa.eu/economic-forecast-and-surveys/economic-forecasts/spring-2024-economic-forecast-gradual-expansion-amid-high-geopolitical-risks_ga#:~:text=Activity%20in%20the%20euro%20area,0.8%25%20in%20the%20euro%20area (arna rochtain an 3.6.2024) maidir leis an réamhaisnéis bhoilscithe san Aontas Eorpach.

sin, clár éigeantach a bheith i bhfeidhm. Neartóidh sé sin trédhearcacht do na páirtithe leasmhara agus do na Ballstáit agus laghdóidh sé an t-ualach riaracháin ar chuideachtaí a úsáideann córas féindearbhúcháin faoi láthair.

3. Measúnú tionchair

Bhí Rialachán (AE) Uimh. 1408/2013 faoi réir measúnú tionchair in 2019. Tá raon feidhme an athbhreithnithe atá ann faoi láthair teoranta d'oiriúnuithe teicniúla, go sonrach na huasteorainneacha don bhoilsciú a choigeartú agus an Rialachán a ailíniú leis an leasú a rinneadh le déanaí ar Rialachán 2023/2831. I bhfianaise an mhéid sin, ní gá aon mheasúnú tionchair a dhéanamh.